



蜀中名勝記卷之八

成都府八

金堂縣

水經註云新都縣有金臺山水通於巴漢以水出金沙因以名山蜀記云金泉縣古有金船沈江之東岸銳底民於水中往往見之矣○寰宇記云縣卽漢處士段翳宅也輿地碑目云段翳宅治內天慶觀是有段隱居李真人二像碑字磨滅不可讀又云如舜禪師塔銘在金堂龍槐院唐節度使杜棕撰文○宋之

畏天畏人
心法
積德名家

曹學
在能

始者



蜀中名勝 卷之八
問送楊六望赴金水詩借問梁山道嶽岑幾萬重遙
州乃作路絕壁劍爲峰惜別路窮此留歡意不從憂
來生白髮時晚愛青松勿以西南遠夷歌寢盛容台
階有高位寧復久臨邛宋勾龍行父送孫太冲詩金
淵春三月桃李照城郭石峽頽鯉魚時時醉賓幕○
金淵志云懷安蕞爾國而有雲峰月峽之勝山之雄
峙從梁劍而來江水洪深自壩灌洛而至晁公武作
雨零堂記云堂依雲麓而中江縈之氣象葱鬱巖壑
洲渚之美映帶左右矣○按中江在軍西北源從漢
州彌牟洛水毗橋等三水會爲一江志云東十二里
曰前河卽彌牟水又三里曰後河卽雒水也碑目云
有幽州刺史牂柯太守漢張子陽墓在沿江五里許
其碑表載順帝永建四年造又云放生記誓文唐太
和二年令狐紉撰亦在中江岸上○圖經懷安軍縣
二而鎮九以縣而言金堂爲大以鎮而言古城爲富
諺謂軍不如縣縣不如鎮舊縣在峽口距東南四十
里鎮在北一里下爲古城河水由灌子灘入斜潭也
○志云峽口相傳鼈泠所鑿又云金灌口東枕雲頂
南披峽口水出山下如岷江之狀上有李冰祠金川
在其下流稍寬平處又云金灌口之東有七織溪白

沙清流文理如織又有柳溪在舊縣南七里常有柳葉從穴中出○華陽國志李冰導洛通山洛水或出瀑口經什邡郫別江會新都大渡志云東南十里有大度鄉漢書新都王恠有陰隲署大度亭長初到日有馬與繡被馳至後爲郫令行至獐亭有鬼夜見稱其夫爲涪令之官過此全家見殺召遊徼按之悉伏辜而還其喪時人爲之謠曰信哉少林世爲遇飛被走馬與鬼語有廟在山麓○志云北十五里昌利山有石室三門容數十人俗呼爲三龍門碑目云唐昌利山有延祥觀碑開元中金堂尉沛國武捷撰○寰宇記云銅盤山在西北二十里北接雒縣南接新都山形如盤洛水彌牟水毗橋水經此山下合中江也○名山志云金堂三學山乃漢州北山一名雲頂一名石城亦名棲賢開照其實一山也志云東三十里三學山李八百三度學仙於此故亦名棲賢其下隘口壁立千仞惟一路可通人騎謂之三學隘寰宇記云雲頂山舊名石城山其狀如城在縣西十五里頂上平可十畝有神泉方丈澄清如照雲霞常與唐天寶六載改爲雲頂山西幸略云唐明皇至劍門山神見形迎駕稱姓李氏後陟武擔東臺遠望祥雲紫氣

盤結空界問左右曰此何處對曰石城山乃悟山神
扈衛之意遂改雲頂爲慈雲焉高僧傳唐開元年鑑
源禪師於此山講華嚴感聖燈現菩薩放光大松林
後有寺額篆書三學字其山四方面各三十里因謂
之開照山矣勝覽云三學山有佛迹石理堅潤瑩白
如玉非世間槌琢所能又有碧玉佛龕藕絲袈裟錦
字心經貝葉金字涅槃經寺前後檜栢皆隋唐故物
又有飛石乃自雲頂飛來先是寺有楠樹已枯石離
而爲二有王頭陀語曰五百年後寺當廢若楠再生
石再合然後復興果如其言碑目云王頭陀塔銘在
雲頂塔院貞元十五年薛倕撰又云三學山飛石記
邑宰張西撰又云支提石塔記在三學山唐節度使
段文昌撰又云鸚鵡舍利塔記在三學山韋臯撰又
云李義山爲八戒和尚謝復三學精舍表略云三學
山夜有神燈朝明佛足風飄雨濕且無金燼落時蘚
剝苔侵尚有寶花承處又云杜光庭功德記在三學
山○隋僧智炫遊三學山詩秀嶺接重煙嶽岑上半
天絕巖低更舉危峰斷復連側石傾斜澗迴流瀉曲
泉野紅知草凍春來鳥自傳樹錦無機織猿鳴詎假
弦葉密風難度枝疎影易穿抱裘依閑沼策杖戲荒

田遊心清漢表置想白雲邊榮名非我顧息意且蕭
然唐王勃遊梵宇三學寺詩杏閣披青磴瑯臺控紫
岑葉齊山路狹花積野壇深蘿幌棲禪影松門聽梵
音遽忻陪妙躅延賞滌煩襟薛能自廣漢遊三學山
詩殘陽終日望棲賢歸路攜家得訪禪世缺一來因
薄命雨留三宿是前緣詩題不忍離巖下屐齒難忘
在水邊猿鳥可知僧可會此心常似有香煙又題開
照寺云盡室徧相將中方上下方夜深楠樹遠春氣
栢林香聖跡留崑險靈燈出混茫何因將慧劍割愛
事空王偽蜀太后徐氏漢州三學山看聖燈詩虔禱
遊靈境元妃夙志同名香焚靜夜銀燭炫遼空泉漱
雲根月鐘敲樹杪風印金標聖迹飛石顯神功偶望
天涯極臨看日脚紅猿來齋室上僧集講筵中頓覺
超三界渾疑證六通願成修偃事社稷保延洪太妃
徐氏和云聖燈千萬炬旋向碧雲生細雨瀝不暗好
風吹更明磬敲金地響僧唱梵天聲若說無心法此
光如有情宋王雍題雲頂山詩五色琉璃白晝寒當
年佛脚印旃檀藕絲織出三衣妙貝葉經傳一偈難
夜看聖燈紅茵茜曉驚飛石碧琅玕更聞鸚鵡因緣
塔八十山僧試說看

簡州

華陽國志犍爲郡牛鞞縣受新都江去郡三百里漢元鼎置有陽明鹽井卽牛鞞井也南齊牛鞞戍設在州城西岸卽古簡縣址○三國志姜維聞鍾會入犯表守陽安關關在西南三里上流井依山爲之舊陽安縣及今陽安驛本此名水經注云晉羅尚乘牛鞞水東征李雄發自陽安關矣○九州要記陽安縣南七十步有赤水如絳源出隆州今治西二里絳溪是也溪上龍門洞有石如龍壁上龍門二字州人許奕書傍刻柳子厚鈇鋤潭諸記乃宋臨歐陽詢書又云

陽安有雁水源出廣漢曹榮譚詩城下水流金雁月亭中人弄玉絃琴是也雁赤二水之間有江月樓薛濤江月樓詩凭闌却憶騎鯨客把酒臨風手自招細雨聲中停去馬夕陽影裏亂鳴蜩○方輿勝覽簡郡設廳棟宇盡唐制梁上題寶曆元年刺史張炎建抵嘉定之壬午已二百九十有八年矣碑目郡守壁記名氏始唐貞觀十三年見劉左史折柳亭記亭在朝天門外舊名情盡橋刺史雍陶詩從來只說情難盡何事教名情盡橋自此改名爲折柳任教離恨一條○方輿云紹興中建西州道院在州治南黎持記

云陽安鄰於會府而有江山之勝處於高仰而有魚
稻之饒民事獄訟比之旁郡十無一二凡隱於吏者
樂趨焉人目之爲西州道院又云望湖樓在州治道
院之後湖光山色交相輝映輕舟小艇時時撐出柳
陰中不謂重岡疊嶂間乃有瀟湘茗雪之景也○志
云簡縣忠清門外有唐太子誦書紀功碑甚巨元和
二年朝議郎使持節簡州諸軍事守簡州刺史李維
勒石碑目云南康郡王紀功碑乃憲宗撰文太子誦
書貞元十三年建原在龍興寺宋天聖五年移在州
衙門外頒春亭側又云在郡市心居民室下紹興丁
巳穴土見碑石太守命工取之重撤民屋不果上錄
其文乃唐御製紀功碑銘并序皇太子書碑面殘缺
不全惟碑陰乃開成元年臯從孫鋌爲本州守日記
述其文俱全遂覆之按此碑已取出今存○志云城
內雙市街有叢桂樓以宋紹興中朱熹同榜李繳如
李進修范時中袁炎牟子正俱州人也太守郭由中
爲樓記○方輿勝覽景德觀在郡南一里山谷集云
簡池覺範道人城東道友也住景德院其家風十二
時似趙州東院西池種竹兩枝於宴坐軒中山谷老
農作頌曰往在江南住竹山道人兩歲三來訪聽風

聽雨看成龍牛羊折角入朝餉簡州城東刮地寒手
種檀欒三兩竿竹成要作無孔笛若有靈龜一任鑽
魯直又有題其也足軒詩詳詩話中○圖經簡有四
岩東西南北也三溪東南前也三池柳鳳賴簡也劉
涇云三溪號一郡之勝前溪在陽安治後亦稱後溪
文同後溪晚步詩云陰陰芳樹暗迴堤路入蒙籠轉
野溪澤雉應媒高復下林鷗引子歇還啼青蒲宛宛
全淹水紫竹斑斑半出泥倚杖風前感時節亂煙斜
日一蟬嘶○巨濟又云南溪壽昌寺前水是也由南
溪沿隄一里許爲東溪李良臣詩簡州何處景最佳

東溪清絕人所誇溪上有碧波亭宋姚孳詩賴簡池
臺兩蜀誇東溪別是一仙家令人却憶康王谷坐看
珠簾濺雨花志云劉文節墓及讀書樓俱在東溪上
今東林寺是其樓址一名東溪菴○志云柳池折柳
橋下水也鳳池在治南三里水自北一里鳳翅山來
賴簡山接金堂山郡池名皆因之○勝覽云東山在
東江之外州治之左志云在城東五里岩高數丈刻
東岩二大字有東巖院智通禪師卓菴處地居兩山
之間溪流其中下有懸溜清音不絕旁有洞又有古
柏大可二十圍爲一郡之望刹也志云卽天王講寺

貞元初施頭陀剎○近巖有雙牙山兩石對峙如牙
上有井及石箱人見兩金鵝其側晝浴於井夜棲於
箱○蜀志補罅云西巖在簡州湧泉鎮有石刻大悲
像光相屢現志云在治西五里巖洞深三丈五尺闊
如之洞門刻西巖二字宋嘉定甲子王武卿結菴於
此題名○近巖有石柱山孤高獨立上有石像百餘
石室數間有仙人楊氏養丹爐鼎尚存登其巔可望
逍遙山○勝覽云逍遙洞在玄都山去城三十里景
德間有楊用晦者隱居此山其上有層崖命工發之
得東西二室西室後刻二竈若養丹之所又鑿二窟

中可坐五七人東西二壁鑄二孔雀二神人有漢安
元年四月十八日會仙友十二字漢隸也今存按用
晦簡池人有仕才能詩任心自適不求當世樂隱洞
中時太原王載京兆金惟吉南陽鄧曦度杜審嗣劉
旻遠來尋訪刻詩壁間○志云南巖在治南一里有
洞深三丈闊二丈五尺方輿勝覽南巖有光孝寺前
敞飛閣盡覽江山之勝左有洞可容數十人卽淳風
洞也石刻無名氏詩煙飛嵐翠撲衣裘落日牛羊下
巖頭莫道山中心意薄江邊桃李自風流簡州學記
李淳風生於州之乾封鎮有故宅及墓按今銅鐘寺

卽報恩光孝寺舊址宋孝宗隆興二年陽安尉歐陽
獬建疏請衡山和尚住持寺前高敞有會勝亭趙抃
知益州時寺僧有能琴者見知於公作琴軒詩贈之
云輟飲支筇會勝亭溪山佳處古琴橫憑君傾耳殷
勤聽一弄清風四座生諫議大夫張方詩早向溪山
得趣深建亭今復寄餘音紛紛塵市無閒地獨有斯
人物外尋○志云北巖在治北二里洞深三丈闊五
尺有坐榻茶竈傍開石牕牕下有泉清冷不竭有寺
舊名白馬院開元中馬祖建倚壁有丈六金身無名
氏詩云一帶江煙半倚巖檻前時眺黑龍潭低昂竹
影疎明月屈曲松枝拂像龕樹老硬根穿石罅草生
嬾葉入禪菴西來白馬無踪跡寒鵲昏鴉暮景含碑
目云院有唐碑其歲月乃大曆時重修石壁刻云郡
守潼川王武卿攜家渡江過唐氏園偶泛舟泊山下
登劉氏江閣因上北巖禮大佛開禧改元二月十有
三日書○近巖有洞曰朝陽深三丈餘高丈有八尺
廣一丈內有石牀額篆石室二字蓋昔人煉丹之所
○志云四巖附郭之勝也其稍遠者有玉華池天光
觀覺林寺又遠則爲分棟長松諸山○寰宇記陽安
縣北二十里玉女靈山東北有泉西北兩岸各有懸

崖腹有石乳房一十七眼狀如人乳流下土人呼爲
玉華池每三月上巳日有乞子者灑得石卽是男瓦
卽是女自古有驗山爲仙人李八百修煉處○勝覽
云李八百居棲賢觀一名天光觀碑目云天光觀在
陽安縣東二十里有唐碑可讀者云太和初三洞道
士王道賜因張文舉施地基創建按今爲明教寺○
志云甕亭山在治南四十里石甕舖有覺林寺在大
道傍王欽若題覺林寺詩暫拂塵襟思倍清竹風山
色亂泉聲安民功淺君恩重又策羸蹄向古城趙抃
詩古寺無碑刻僧云不記年自余安所問惟是愛林

泉○志云分棟山在州西七十里寰宇記曰山北連
秦隴南入資瀘東北入靜戎在靈池縣東上十五
里劉涇分棟山少休亭記云自成都趨陵簡如在蜀
必由靈泉過分棟其山周數百里高大阻險以石次
第爲步暑雨冬雪則馬不進僕亦以病告欲少休於
是建亭名少休焉○志云西北七十里長松山爲州
斧戾界內諸山皆發脉於此長松寺本蠶叢廟址開
元中馬祖行空和尚乃建寺明皇召對賜額長松衍
慶寺又賜名香爲亭以貯之曰御香亭宋賜名嘉福
寺今名靈峰○唐鄭谷集云谷自亂離之後在西蜀

半紀餘多寓止精舍與圓昉上人爲淨侶昉公住長松山舊齋嘗約他日訪會勞生多故游宦對年曩契未諧忽聞謝世愴吟四韻以弔之詩曰每思聞靜話雨夜對禪牀未得重相見秋燈照影堂孤雲終負約薄宦轉堪傷夢繞長松塔遙焚一炷香○志云蟠龍山與長松相接大曆四年郡大夫傅耆造大佛建院曰石門以山石分開似之院門又有石形如夔刻字其上曰夔石楊甲遊長松寺宿石門僧舍以石門霜露白爲韻得露字詩云疾風吹輕衣駕我雲脊路人間一回首驚絕不敢顧鳥投虛無底渺渺不知處蜂

窠蟻丘垤與世同所驚試看一蒼莽誰有不平慮尚憐野僧屋佛面荒苔蠹斷崖劃呀吻洶洶崩石怒我來得奇觀拄杖叩巖樹青山有驕色斯客不能句平生二三子慰我一相遇娟娟松間月幽夕亦可度夜闌更小語風逼遺響去酌君無多酒繼以木蘭露諸公綽石門院詩云搖空柳色金猶嫩傍道梨花雪未開只尺長松煙霧裏石門頂上暫徘徊○碑目云周文王廟碑在陽安縣西北七十五里卽後周高祖文帝之廟舊碑題額云大周植元年歲次丁丑造元年卽後周閔帝之初元也今石刻存○志云去郡治五

十里山曰賴簡自賴簡西亘潛度雁江而直走龍泉
又曰隆泉在治北八十里以澗水隆盛爲名○寰宇
記云靈泉在靈池縣南三十五里隋初縣傍出湧泉
因置平泉縣於此唐改靈泉志云廢靈泉縣在州西
北七十里隆泉驛之右楊甲靈泉山中詩云小縣相
籠合濛濛數百家菓蔬爭晚市樵牧亂晴沙落日平
林迥青山去路賒偶居無事在隨意問桑麻又野色
山圍盡風煙更可憐客情牛鐸外農事藕花前聚汲
松根井寬愁石底泉雲安須斗水詩興亦超然又勝
地仙靈宅微官也謫居焚香他日夢隱几向來書小
睡便山雨長齋稱野蔬逢人問無恙滿意說樵漁又
日下叢林薄芊芊肅晚暉閉門成小隱飲水亦生肥
醉着溪藤杖歸來木葉衣狂歌有虎兕吾道只應非
又何處長松寺雨花雲外臺山從百曲轉路入九關
回老檜成龍盡殘柯借鶴來人間斤斧亂風壑夜聲
哀又靈泉山上晚望詩云野曠樹還亂林深煙更微
天隨殘日盡雲掣斷山飛玉壘風煙闊秦樓草木非
憑高千萬事今夜客沾衣蒲瀛宿靈泉無我軒懷次
山詩幽軒著無我居此合何人聞道東山隱當時此
地親心源將止水世事甚浮塵今日尋遺跡空餘淡

墨春自註云壁間有次山題字也○成都文類益部
十縣多引江水溉田咸爲沃壤惟靈池疏決不到須
候天雨俗謂之雷鳴田縣東山下有朱真人洞洞北
岡嶺連屬逾廿里得楮聖母祠化跡尤異民咸事之
祈禱獲應潘洞詩云錦里城東邑高原十六鄉江流
分不到天雨降爲常節及三春後晴逾兩月強龍乖
尋穴蟄魚困入泥藏樹影全虧綠苗姿半吐黃耕夫
皆慘戚市戶亦倉忙潛慮寃無雪深疑政有傷推恩
慙睿主引咎謝虛皇磬折真人宇星奔聖女堂先時
蠲玉饌隔夜浴蘭湯洞口焚香遠山椒作梵長幽誠
期必達玄應果旋彰雷振南峯下雲飛北嶺傍聲稠
喧竹塢勢迫瀉銀潢飄灑運三晝霧霏遍一方稻畦
煙漠漠蓮沼水泱泱物態涵優渥民情遂樂康洪施
周庶品餘潤浹他疆稔歲還堪待陰功詎可忘明靈
何以報奮藻紀遺芳按朱真人祠卽安靜觀也揚甲
宿安靜觀詩青山轉龍脊矯首西南天上有仙人祠
臺殿飛後前下見雲雨興樹色暗平川仙人兩黃鵠
一去無歸年向來道上屨人着幾何錢一朝聞羽化
悵望空流涎却揮囊中金瓦礫來投捐巖巖化金碧
香火通雲煙人間萬事爾旦暮有愚賢而況爭奪場

轉手分媿妍仙人一回首破隴與荒阡紛紛不足道
哀此區中緣石泉瀉幽潔意寂不肯喧夜聞松風露
起坐心寥然又云一濯巖下溪再拜巖中庭清風肅
然來吹我衣上脰仙人芙蓉冠乘月下雲輶山空雜
佩響靜夜朝百靈似聞客欲去小語猶丁寧蕭蕭上
松栢急以兩耳聽寂寥古壇外但掛斗與星天明恐
是夢恍惚遺心形去飲石上泉再讀幽人銘青山無
行迹霧雨松冥冥○古今集記云靈泉縣界有瑞應
院唐永平中段文昌來攝靈泉尉手植四松於此院
有石刻云乾坤毀則無以見寺寺不可毀四松其遠
乎松至天福初止存其一縣令張松復補植三株有
栽松記刻於石今不存楊甲詩云木落石出荒山臺
上有佛寺孤崔嵬斷椽圻瓦無四壁古佛已倒何人
推野蜂占窠挾肩背山鼠出穴銜髯鬚老僧見我欲
愁哭野葛蔽路官能來文昌種松有斷刻石柱半裂
荒莓苔老翁鼻祖無一在獨樹晚出非耆鮐乾坤未
變已先滅幾見賊火翻狂雷至今野叟鑿山破石窟
尚有龍觔骸當時手種意已遠欲與草木爲渠魁

仁壽縣

寰宇記云陵州漢武陽之東境晉初西城戍也州南

有陵井周武帝因以爲州名○陵井監圖經漢張道陵經茲地有山神稱十二玉女指陵上開鹽井監以陵名志地也文同奏疏謂因張陵以名井復因陵井以名州矣大觀四年改爲仙井避其諱云郡國志曰仙井陰氣襲人入者輒死投以火則煙氣上衝濺泥漂石沸吼如雷今玉女祠是其處○王象之碑目云張天師靈廟碑元和十五年知陵州李正卿撰文咸通十五年丘沖書又云黃帝陰符碑在州城至道觀宋京記云此中江山瑰奇自古王公貴人詞客才士未嘗一至故不得見於歌詠而爲浮屠老氏之學者

往往擅而有之○方輿勝覽云艷陽洞在州城北至道觀之後昔天師旣誓玉女於井因藏去其衣鎖之石室或謂之藏衣洞洞在重巖下哈呀幽窈晦明變化千態萬狀雖距闐闐不數武而若與世隔蓋道陵修煉之區也杜光庭錄異記云焰陽洞古老相傳在陵州陽山之上從來隱蔽人莫知其處乾德三年辛巳正月十六日癸卯井監使保義軍使太保馬全章夢一紫衣束帶魏冠者狀若道流揖之俱行至崖壁所告曰此焰陽洞也閉塞多年能開發護持可以福利邦國又指其地近開小徑曰可斷之勿使常人踐

踏言訖而去又旦往尋其所果見土勢微陷以杖導之深不可測卽令本軍節級侯廣之勾當人夫斲地漸獲蹤由相次開掘見三重石門洞內並是細砂一無蟲蟻他物其洞自東入西深三丈九尺闊五尺三寸洞門三重第一重高六尺闊五尺二寸第二重高五尺五寸闊三尺七寸第三重從頂至底一向高六尺一寸三門相去各只三四尺鑿鑿精巧殆非人工三門內南畔別有石房闊七尺四寸高四尺八寸深四尺二寸其後別有一小洞洞門有片石遮掩旁通一縫以燭照之深不知其底北畔亦有石房深四尺闊七尺三寸高五尺房內有石牀一西畔又有小石房深二尺闊三尺五寸高三尺一寸西北畔有石牀長三尺八寸闊二尺八寸有石竈模長二尺三寸額闊七寸竈深八寸周圍三尺五寸計從洞門向東一直至鹽井西相去可四十一丈八尺井在洞門正東也全章乃召當井監天師院主內大德費省真問之荅云天師院見有元和年刺史李正卿著天師聖德碑云天師以東漢建安二年自沛遊蜀占犍爲分野見陽山氣象指謂弟子此山直下有鹹泉焉今驗此洞正當井上卽夢中所指者也碑目云洞顏隸書艷

陽仙洞四字字體兼篆不知何代書旁有款識歲久磨滅東南賈人見此碑本寶而藏之以爲真漢隸志謂有東漢仙都四字在天師洞未詳○碑目又云仙井監有蔡君謨法帖蘇東坡心經帖文與可書千字文陸務觀跋蔡帖云近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元年九月八日蜀州手裝○勝覽云艷陽洞前有蓬萊閣秦少游詩雄簷傑檻跨崢嶸席上風雲指顧生千里勝形歸俎豆七州和氣入簫笙人遊晚岸朱樓遠鳥度

晴空碧嶂橫今夜請看東越分藩星應帶少微明程公闢次韻云半天鐘鼓宴崢嶸早晚晴陰景旋生湖暖水香春載酒月寒雲迥夜聞笙金鰲破海頭爭並玉雁排煙陣自橫我是蓬萊東道主倚欄先占日初明按蓬萊閣在治東百許步又有含暉閣近五十步趙閱道詩曉川嘉樹照雙扉披豁幽軒景盡歸自喜吾懷已虛白三嶠山色更清輝○輿地紀勝云平雲閣在郡圃文與可詩陵陽郡事全稀少懶守長羸半日閑晚後須來上高閣就中無厭是雲山與可在州送通判喻郎中詩可笑山州爲刺史寂寥都不似州

城若無書籍兼圖畫便不教人白髮生又云近日簿
書全簡少吏人惟聽兩衙休歸來便只尋冠履遶遍
林亭山上頭○與可又有自然水石記云陵陽守居
負山悉石西左砌層崖餘地丈許平夷可屋因植四
楹面午橫楣闢幽軒正對大林高株缺間視遠峰若
畫工引淡墨作巒嶺疑疑時與煙雲相蔽虧愛此有
佳趣復靜密公事少休卽至宴坐伏息日計數取多
乃去外俗不得知旁頽巨礪如瘤宜鑿刻遂磨治將
紀建置歲月沃水盪拭見黝理若髮狀傾灘平波瀾
漫漶迤復疊先後倫次窪淵聳浪左右役目自非天
寫神摹人巧孰能爲是必由融結固已有堅包厚藏
待予始發章物蓋顯晦信在時人理疑亦然苟達此
與知命何遠雖爾旣有形必復壞倘後人加護則傳
久未易泐也○李膺益州記云東西南三山相對州
治居其中去陵井各一里謂之三嵎山按古謠云三
嵎青陵陽榮三嵎翠陵陽貴郡守何耆仲嘗於東山
之下作青榮臺以表之張紹祖山扉記曰有岡北來
莫窮所自不亟不徐勢趨東南欲薄城下岐而爲三
行且五里虎踞盤礴不復去此陵陽之所謂三山也
○西嵎曰跨鼇卽州衙坐山李石超覺寺記云州以

跨鼇名者居三嵎山之槩也去治半里方輿勝覽云跨鼇山上有跨鼇亭每歲上元重九太守率僚屬燕其上有石姥在山頂歲旱里人轉徙之天卽黯黳雨四注文同賦云上簪岑之飛泉兮披蒼蔚之榛莽爰有石之跂跂兮旁無他而相伍其遠睨之若人兮迫猶疑其蹲虎里俗神而甚恭兮號相尊而曰姥又云印山在其坳卽捫膝先生喻汝礪故居○南嵎曰翳嘶頂上有翳嘶廟相傳神卽巴郡太守嚴顏也宋何桌作碑記併書山前有霄漢堂紹定中隆州軍事推官文太虛爲碑記俱存山之麓有更生寺宋丞相虞允文爲其父秦國公建碑云紹興十八年六月二十六日鄉人鮮于述旣死復甦言地府有更生佛故秦國虞公祺也明日以告丞相正秦國小祥之期丞相因言秦國屬纊時微疾耳忽睨坐客古佛俱來吾當歸允文泣下公顧曰身得爲佛有何不可含笑而逝按寺在縣東南數百步秦國又有功德院在城西王元虞集仁壽寺僧報更生佛祠前生瑞竹詩云聞道故園生瑞竹令人歸興滿江干扁舟不畏瞿塘險匹馬誰云蜀道難杜甫溪頭花匝匝孔明廟裏栢闌珊新堂題作歸歟字定得臨江把釣竿伯生丞

相裔孫也有還鄉詩云還鄉思速去鄉遲王事相縻
敢後期里父留看題壁字山僧打送捨田碑胡桃笻
竹南方要盧橘枇杷上國知此日君親俱在望徘徊
三顧欲何之又云未忍他鄉作故鄉故因使騎入陵
陽鄉人共訝聲音似客路疑將髮髮蒼親老長懷鄉
里思孫多宜置墓田旁治生自可依諸葛數頃膏腴
八百桑○東嶠曰飛泉上有超覺寺按圖經隋仁壽
元年獠反百姓城於山頂避難遂有飛泉湧出獠平
泉涸因呼爲飛泉山文與可詩東城兀高峰爽氣浮
翠微霞光射巖壁中有寒泉飛碑目云飛泉院碑唐
神龍元年立超覺寺碑廣明二年陵州刺史蕭兢記
志云超覺寺有爾朱仙影刻二片一全影一半影也
有乾道中虞丞相書碑勝覽云飛泉山下蟠溪丞相
何公卓所居何公始生六日瑞雲山當夜半紅霧亘
天此山東去蓋四十里○碑曰云佛龕山有唐貞觀
中率更令歐陽詢書金剛經磨崖碑按卽佛厓山也
在縣東二十五里志云山有三石像背虛面巖俗呼
倒坐寺○碑目又云東北石城山平等寺有天寶四
載薛兼金撰道超和尚精德碑勝覽謂石壁如城絕
頂望見峩眉也○寰宇記云州南一里鼎鼻山隆然

特起又曰隆山隋大業改陵州爲隆山郡本此郡國志云周之九鼎淪一於此往往見鼎耳因名南七里一泉水碧色投銀其中成色卽變孕婦飲之墜胎俗以爲聖泉矣○圖經云南二十里有麗甘山山下鹽井是十二玉女故迹以玉女美麗井水味甘合而爲名也又云古鹽井號聶甘井井傍有神祠號曰聶社○又二十里有儒社山虞允文書碑云紹興癸酉十月八日允文來遊知先世種德本末感愴久之石刻今存佛子寺○郡國志云縣西朝女山昔有女子居山悟道肘脰之蹟印石上猶存○碑目云後唐同光三年靈泉院碑在本院山上按卽譚子池也亦名天池宋進士郭周藩詩云靈泉在山頭酌之不盈卮試詢陵陽叟何云譚子池一叟爲我言郡有譚叔皮在唐開元末生兒名阿宜墜地解言笑九歲森髯髭不食且不飲超然忘渴饑十五銳行走夔若神駒馳二十入山林人莫知所之父母念不泯鄉人爲立祠大曆元年春此兒忽來歸頭簪鳳凰冠身着霓裳衣再拜向父母一吐心中詞兒乃仙子流塵市不可羈鄉人意雖厚立祠將焉爲妖魅一朝據作祟無休期急爲告鄉人毀之勿遲遲祠下多金藏不知使何時盡

蜀中各勝 卷之八
取濟不給幸勿藏於私言訖卽辭去仙袂風披披於
焉撤祠宇突兀成平夷果獲千黃金貧匱得所資金
盡泉繼湧湛若青琉璃不滿亦不涸旱澇恒若斯禱
之立有應翕如塤協箎由來羽化人出處同鬱儀去
今數百載跡在名還垂志云天池山麓有顯忠院宋
尚書僕射何臬藏主處臬從徽欽北狩死沙漠華表
柱猶存又有寶籙院宋寶謨待制陳咸葬所號寶謨
阡已上在北二十里宋故事名位顯者得於墳側建
刹度僧以薦先福焉○志云陵州梵宇多以龍名若
龍興龍居龍泉龍厓是也龍厓者鐫石爲龍卧厓下

卽文與可鐫怪石墨竹處跨鼇山人李新題云淺梢
疏節似瀟湘正向祁寒敵曉霜清興未窮僧已老自
餘山色與溪長雅安僉判程壬孫詩風雨勞先別敢
辭尊酒深一梢牆上竹留作歲寒心俱在寺壁龍興
卽報恩寺寺有大悲堂大悲閣王象之碑目云龍興
寺大藏經碑開成五年吳商撰古大悲堂碑乾符三
年周宋莒撰俱在報恩寺篆字心經碑咸通七年仇
溥撰并書修大悲堂碑景福二年僧承徽記俱在小
大悲閣又云僧曉微碑在寶林院西蜀明德元年立
又有顯教大師碑廣政四年立鐵騎將軍碑在歸安

鎮孟蜀廣政二年立○寰宇記云貴平縣漢廣都之東南境後魏時與平井縣同置舊治和仁城開元十四年移治祿川一統志云元憲宗時併當縣按圖經祿川距貴平縣三十步發源簡州下注資江而東水多魚蝦縣人利之過祿川有蘭溪唐隱士張鴻居其上按益州記平井縣兩竈二十八鎮日收鹽四石如霜雪是也○碑目云貴平縣文宣王廟碑長慶五年陵州刺史李正卿撰尹泰階書按碑在縣址後百步可搨而聖賢石像委榛莽中近方燕之碑後巖下○寰宇記云唱車廟在貴平縣南九里漢朱辰爲巴郡守有恩於巴吏人送辰到蜀回至此爲辰立廟以其山近鹹井聞推車唱歌之聲爲名今鹽井推轆轤皆唱爲號令焉碑目唱車山開國王碑貞元元年貴平令王覺撰牟尚書墓記同光五年領州事陳貴民撰○又云貴平西北四十里寶峰院有唐人撰寶峰院記院內有王羲之記王氏廬墓銘按志邑王氏女至孝親沒廬於墓側三年有司立碑表之王羲之爲作廬墓銘剝蝕殆盡○寰宇記梁天監置席郡隋廢爲縣里語譌爲籍縣志云在縣百七里今爲鎮又籍田公館近華陽界縣南有地畝餘踏之軟動有泉淵瀾

早不涸湧不溢名曰息壤魚地水在其北導江水在其南丹砂山在其西也○碑目漢黃龍甘露之碑在籍縣江口上銳下方其狀如鐘大書漢黃龍甘露之碑七字餘不可讀其可識者羣臣將軍位號蓋爲龍紀也

井研縣

寰宇記云縣本漢武陽地有彭山彭首獠姓在始建鎮之東志云後魏置蒲亭縣今縣東一里黃丞相池是也池中生蒲起亭以存古意○周地圖云蒲亭縣有鐵山諸葛亮取爲刀劍宇文度封鐵山侯卽此志

謂鐵山一名茆香山在縣東六十里舊始建縣東○寰宇記云井鑊山在縣北其山俯臨井鑊因以爲名玄宗幸蜀井鑊山神見卽此山也○碑目云唐節度使楊公墓碑在隆州井研縣道傍有石刻云唐銀青光祿大夫檢校御史中丞上柱國節度使楊公墓旁多楊姓乃其子孫也又有宋何桌撰陳德用墓碑銘在縣南四十里木龍鄉宣和六年立又有青陽仲廣塔記在縣之天王寺其略云寺有塔以藏舍利爲層十三此釋迦氏殊勝莊嚴僧祖逢創始於隆興壬午基就力不繼邑人憫焉願續其事邑之利源以鹽自

層一至九費所取者三之一施心殊未厭又合力爲第十層工徒輒瓦之供自十而上合尖有期矣嗚呼事有一人營之百人終之者不營於始無以開其先不續於終無以卒其功百人者一人之繼是塔之興雖多歷年所然終於有成者百人之助也掌化任剛乞文刻石置層上以紀歲月云

資陽縣

華陽國志資中縣受牛鞞水寰宇記縣本漢資中縣後周武成於資中故城置資陽縣以資水爲名○志云城西二里資谿縈紆九曲合流雁江近掘得宋張

方題資谿橋詩有資水右旋江會合之句也王巖資陽江詩淡雲殘雪簇江干策蹇遲徊客興闌持鉢老僧來咒水倚船商女得搬灘沙翹白鷺非真靜竹映繁梅柰苦寒阮籍莫嗟岐路異舊山溪畔有漁竿范祖禹月夜船行入資川詩憶昨卧碧山蒼蒼叢桂間白雲爲屏石爲枕綠蘿長掛明月閑忽乘輕舟泛江水山月隨人還在此白鷺驚飛宿靄間青山倒卧蒼波底此時孤棹發中流川後停波聽棹謳不學子猷中夜返欲乘明月向資州○志云漢王褒故宅卽今縣理解中八卦井三字子淵筆也輿地碑目云西漢

王褒宅在資陽縣西駟馬里今改爲靈仙觀有觀碑
二說微有不同舊圖經云資陽南五里書臺上豐碑
廿餘片刻聖得賢臣頌山是王子淵讀書處有洗硯
池一勺○又云縣之延壽寺漢董鈞故宅也志以爲
宋張方宅按亨泉墓在縣北廿里有石獸存其宅未
詳○方輿勝覽資山在縣西南三里迥然秀拔卽寰
宇記之獨秀山也范祖禹資山詩云醮壇巖谷多神
仙鸞車鳳輦隨飛煙神女瀟瀟來暮雨浮丘往往下
雲輶○碑目云資陽有三仙磨厓石在三江鎮刻云
貞元十四年十月十日杜錫崔熊席夔三人同遊○

郡國志資陽有鑾溪百丈池所謂溪流如鑾池深百
尺也志云學宮前有星月池有井傍池如星東一里
有放生池有碑碣顏真卿書南廿里有孔子溪石壁
上鐫孔子字云其地昔有鄉校祀夫子刻記猶存

資縣

禮記萇弘氏孔子嘗問樂焉死之三年而血化爲碧
按圖經萇弘資中人有祠在青泥坊數里之內土色
尚青又云王子淵墓在縣東二十里墓前石碣高丈
餘碑目云王褒墓右有河相弘農碑未詳人代○唐
元和中羊士諤爲資州守風流文采照耀一時其詩

云洛陽歸客滯巴東處處山櫻雪滿叢峴首當時爲
風景豈將官舍作池籠登郡前山作也一雨東風晚
山鶯獨報春淹留巫峽夢惆悵洛陽人柳意籠丹檻
梅魂覆錦茵年華行可惜瑤瑟莫生塵郡中早春作
也腰章非達士閉閣是潛夫匣劍寧求試籠禽但自
拘江清牛渚鎮酒熟步兵廚唯此前賢意風流似不
孤郡中詠懷作也二毛非騎省朝鏡忽秋風絲縷寒
衣上霜華舊簡中承明那足厭車服愧無功日日山
城守淹留豈桂叢郡中見白髮作也又郡齋讀經作
云壯齡非濟物柔翰誤爲儒及此齋心暇翛然與道

俱散材誠獨善正覺豈無徒半偈蓮生水幽香桂滿
爐息陰慙蔽芾講義得醍醐跡似桃源客身嬰竹使
符華夷參吏事巴漢混州圖偃草懷君子移風念嗇
夫翳桑俄有績宿麥復盈租圓寂期超詣凋殘幸已
蘇解空囊不智滅景谷何愚幾日遵歸轍東菑殆欲
蕪竇叔向雨後月下寄懷羊二十七資州云夕霽涼
颯至翛然心賞諧清光松上月虛白郡中齋置酒平
生在開襟願見乖殷勤寄雙鯉夢想入君懷○碑月
云羊士諤在郡有毗沙門天王贊碑歲久陷於城北
隅紹興中邵博爲守始掘得之又云青松亭記在麗

蜀中名勝 卷之八
治唐乾符四年西川節度使成都尹高駢文并書又
云瀛洲亭在郡圃繪唐十八學士鮮于侁文并書又
云聚書樓記李石文博雅堂記張震文俱乾道七年
立碑○聚書樓記略曰國家渡江以來晚五厄之會
收四部之富頒詔首降三館所儲兩學所集分錫郡
國州有書樓侈其賜也自宣和辛丑前太守魏侯潤
博以州號多士請於朝減他州之賜以益此州宛乎
如韓宣子所見周書之在魯矣歲久鼠穿魚蠹且爲
有力者夜半負去今守宇文侯爲州起發手書之家
傳人市殘缺散逸者咸綴錄焉比舊日增千餘卷因

舊樓徙故葺新復爲廚肆貯之○博雅堂記略曰宇
文紹奕爲資守風清事簡則歎曰自吾承先大父右
丞相公餘烈以詩書發身凡二十年間聚書上自孔
氏下至歷代諸史稗官小說與夫國典名公之文合
萬餘卷手所校錄者幾半之不爲不多矣顧猶有遺
恨者嘗見前漢文字之與篆隸之工鏤金石而傳後
世尚有可攷乃其在中原者淪於夷狄後生不可復
見吾家故所貯吾幸得之不欲擅而有也蓋傳之是
邦以與學士大夫共之於是摹刻漢石經及他碑凡
五十四卷覆以石柱大厦名其堂曰博雅登斯者如

入太廟見尊罍彝鼎簠簋孟豆之陳聞咸韶濩武雲
和箜篌之音列天球河圖寶玉大弓之器饗太羹玄
酒昌歆醑粢之味莫不咨嗟嘆息以爲君侯好古博
雅之士矣○方輿勝覽云企仙閣居郡治北憑高視
下得一郡之要李石爲記以李傅侯張各據一山合
四山而拱揖之故曰企仙亦曰蓬萊○志云州北二
里醮垓山李阿修煉處肖像猶存杜光庭有醮垓山
北帝院記以爲張道陵居焉山畔有洞鑿石七十二
級遠望之如入雲中范祖禹詩醮壇高倚碧天開中
有清都白玉臺霧擁雲旌乘月去風吹仙樂下天來

○方輿云縣西三里平岡山傅仙宗所宅也崔中吉

崔達亦居此○志云玉清山上可以瞰平湖在州南

二里侯真人遺迹存焉又云得道山在州西十五里

張開光於此得道也碑曰陳圖南得道山詩鐫於石

壁邵傳○宋京云東蜀領郡十六而江山瑰琦資中

爲最資中勝遊十數而北巖爲最謂縣有東西南北

四巖也圖經距州城東三里曰東巖形若剖菴側立

千尺溪壑深杳石壁上刻中興頌顏魯公書縱廣盈

丈去磨厓五里有唐明渡以明皇所經矣巖上鐫宋

承議郎鄭鋼詩云逕轉得幽谷雲巖屹相向豁舒偃

重簷灣環依疊嶂緬想融結初鑄鑱自天匠了無斧
鑿跡但覺盤根壯深可數千尺廣逾八九丈洞穴旣
窈窕松門亦昭曠廓舍三千界中列五百像巨楠布
幢蓋翠蔓垂帷帳木靈不知名境幽或難狀我時馳
征輶犇走勅塵鞅獲此一段奇欣然愜微尚欲去興
未闌行行重回望末云宣和壬寅題又鑄云丞相大
觀文沂國趙公以東川鎮鉞晝繡來歸弭節鄉郡爲
父老大夫士七日留乃歸內江之府第郡守楊樵執
門生禮敬餞於東巖一時賓客直秘閣新利路運副
韓炳新巴州趙伯總新恭州趙善詔新大寧監黃中

前昌州黃圖南新富順監黃裳制幙勾龍復成與俱
語出林杪慷慨與坐客盡醉公抗大節於天下而略
位貌於鄉黨於是氣凌八極矣樵請磨翠壁紀盛事
共託公爲不朽咸曰然淳熙壬寅二月十七日題○
方輿勝覽城西六里爲西巖山行不踰百步石壁夾
道如城如峽○又云城南五里爲南巖按卽重龍山
也岿峩盤屈隱若龍轉有亭閣梵刹跨其上江山城
市歷歷可觀○又云北巖去郡城半里等慈寺之東
唐盧弁詩地靈無俗草巖靜有仙禽者此也郡志崖
巖古像半蝕苔蘚乳泉滴瀝四時不絕蜀志補遺唐

李渭爲刺史有遊山詩云淮陽清淨理永嘉山水心
刻於等慈寺壁碑目云邵泰修北巖寺碑洗公石馬
塔院碑滴水巖結界碑俱在本寺又云盧并及張公
瑾北巖詩俱刻在龍水縣○寰宇記云龍水縣本資
中地隋置在龍龜溪資陽西界依龜山隴爲城今縣
三十里龍水鄉是也溪水屈曲蟠擁猶龍亦曰龍潭
石壁有古刻云積雨新霽灑爽澄空寓異探幽人生
行樂殊不易得縣令任聖用挈鄉人蒲君勉楊述美
洎邑士張和叔飲於龍吟亭風味相投山樹巖石咸
助意氣且移罇潭上醉歡歌笑見月迺歸乾道辛卯

仲秋丁未述美書○范祖禹知龍水縣公餘紀興詩
云縣門倚巖谷終日對青峰初仕借爲宰讀書過三
冬忘機狎鷗鳥觀稼親老農訟庭可羅雀銅印苔蘚
封○續古今記龍水縣有昭烈皇帝碑形如方柱頂
如蓬壺文剝落三之一紹興丙寅孫原濟書○碑目
云龍川邑小而江水環秀距邑不三里曰靈巖又其
傑出者端平乙未夏五月十有八日東川撫屬古渝
李粹甫來酬供於此邑令眉山孫子山警曹烏山馮
亨叔相與訪古靈湫載酒酌其上午暑正劇樹林陰
翳巖氣襲人恍若此身在冰壺絕不知人間炎熱之

苦竟日徜徉興殊未盡而景已晡矣遂拂翠崖而書以紀歲月云前蜀馮銖靈巖秋月詩青松崖上紫雲生崖下仙人約舊盟駐馬看碑驚化鶴暮雲回首萬家城銖仕前蜀武成爲盤石令也○寰宇記云盤石在州城北二里狀若盤陀後周以之名縣遂寧傳者盤石遷治記云珠江流其前丹神隱其北醮垓據其左靈巖蟠其右劉光祖記云資號珠江以地之靈而產瓊異相傳江中有夜光如燭方輿勝覽云丹神山在盤石西北五里山之神靈值旱告之卽雨寰宇記之丹山縣因此名也○按魏書保定二年資州盤石人反殺郡守據險自守州軍不能制總管陸騰率軍討擊破斬之而蠻子復反所在蠡起山路險阻難得掩襲遂量山川形勢隨便開道蠻獠畏威承風請服所開之路多得古銘並是諸葛亮桓溫舊道是年鐵山獠抄斷內江路使驛不通騰又進軍討之一日下其三城招納降附者三萬戶今資陽之丹山鎮入其縣界○圖經廢銀山縣在州東四十里山形如錠今銀山鎮是其處古今集記云唐田游巖入蜀居於銀山聚弟子歌雅詩以爲樂今山有雅歌臺石刻存志云銀山候館因掘地得一小碣石乃黃山谷與門生

戴經弟綱尺牘云七二郎氣秀而有骨他日學問仕宦皆當過人要須得一佳士與遊養其忠厚之源此最爲先務涪翁書贈戴六六七二秀才伯仲志云鎮之杜家溝池水一泓清泠澄澈下卽龍泉洞也天將雨則雲生竅穴霧瀾空谷前有石柱殿相傳龍出毀殿止存二柱崖上鐫二龍土人懼其飛動摧去兩角山谷曾遊此碑目云龍泉洞壁刻有淳熙丁未三月九日何少虛少明從成都張無咎來汲深晤坐因訪舊題數丁亥仲春六日字書與當時人物磨去已六七十年間幾風雨矣少虛且老日有倦遊之歎方爲涪翁釣磯之行益起丘壑之念故山猿鶴其能忘情哉又有王齊賢李若水王簡熊九能濯凡塵步武而去○寫韻樓記資州古碑有祝融氏祝誦氏之號學齋咕啤云資州掘地得漢碑有伏羲倉頡初造工業畫卦結繩以理海內等語碑目云隋勅改羅漢院碑在法雲院唐開元棲神山略記在法鉢池前刺史房渙文崇壽觀碑天寶二年建玄宗書額御史中丞宋渾文已磨滅裴晉公自贊在靈虛院左僕射裴瞻墓在盤石縣北五里有世譜碑記藏於寶靈院馬端臨通考云資州以新絳帖十卷刻石子家多有之前有

蜀中名勝 卷之八 三十四
目錄元刻麻石上續揚者不逮舊所得本道勁已上
皆不可攷

內江縣

華陽國志江陽郡漢安縣郡東五百里土地雖迫山
水特美好宜蠶桑有鹽井魚池以百數家家有馬一
郡豐沃○水經注云雒水又逕漢安縣謂之綿水口
又寰宇記云周天和中於資中地置漢安戍在水濱
尋改爲中江縣隋開皇避先諱改爲內江仍徙治於
漢安故城卽今縣也勝覽云中江水經盤石縣自十
字水流入縣界又云內江有水深百丈實羣川總會

之所矣晉郭璞城讖云山行依舊合水去復還來沈
約宋書云中江爲內水涪江爲外水按志中江源出
汶山自灌口分支經懷口入簡縣歷資江而下爲中
江經三堆山下西折而東至縣復東折而南至柁木
鎮又南折而西至黃市市距三堆十五里一水周環
九十餘里而縣當其中故曰中江江去城不百武與
城內桂湖相通以盈縮清濁知之也按湖在西北街
宋黃思莊大書二字于岸石上旁植桂樹影可婆娑
矣○碑目云漢永建五年陳君爲漢安長失其名有
陳君德政碑在獠井壩層崖之腹字雖磨滅然尚可

攷又有漢永建五年漢安修棧道記俱在內江縣○
本志云宋紹興末於內江縣置安夷軍董昌齡時爲
令移徙新市平縣基得小碣一片刻詩云戰馬向風
嘶荒雞隔水啼終日隨征旆何時罷鼓鼙○志云城
東半里東林寺紹興中建有石佛按卽東津寺也范
祖禹資州路東津寺詩云山行無晨暮日暝崖谷昏
哀猿落客淚永路驚旅魂憑陵高山巔俯視大江奔
迴環島嶼合縈轉洲渚屯行雲赴炎天飛鳥下蜀門
地遐怪物聚寺古深殿存憶昔李氏末煙塵暗中原
奸雄競草竊割據窮海根干戈百年後見此敗屋垣
我來屬清秋登覽無俗喧山深虎豹歸水靜蛟鼉騫
臨風獨笑叱浩蕩欲飛翻自註云寺有石佛殿唐乾
寧元年建○志云城南銀杏舖江邊有放生碑欸爲
宋都護校尉周仲亨立有寶光洞壁上鐫雲塞浴溪
口金波光明久十字紹興進士邑人閻執中書又云
銀杏舖之陰江所遶也渡江對岸爲葛仙山相傳吳
郡葛孝先曾棲其上今有巨人跡編戶葛仙里之名
本此○志云治南二十里有高峰山瀕江有洞曰會
真中刻大士羅漢甚古唐大姓閻氏所闢者洞幽邃
時或撫掌聲若鳴蟬中多斷碣○志又云城西二里

化龍山麓舊縣址也有長生觀凌風龕及冷然洞咸
淳中郢有朱真人者棲其中修煉有吐納之術其冷
然洞記略曰予落迹安夷有長生池丹臺冷然洞青
眼不逢揭籃而去因有容迹安夷尋達者無緣寄語
共乘風之句也咸淳癸酉九月五日記又留題化龍
山云郭外郊西柳已芽東流注目浩無涯江明白白
紅紅樹春在三三兩兩家幾度來臨逢社燕一樽相
對到昏鴉此邦物色吟成盡高謝山中景致嘉刊碑
在長生觀中正嘉之間山崩得古鏡及劍印石刻識
云有宋之始化龍爲記日月相均永遠不墜亦疑朱
仙所留○又五里爲聖水寺寺有靈湫古碑紹興庚
申水觀禪師所剞邑尉蔡逸詩云二月春事半縣花
無數開江頭連騎行江霧結紅埃下馬坐清蔭觀漁
大江隈行行歷山寺金碧森樓臺拂石有唐碑字老
生莓苔緬想古今事悠然一傷懷解榼醉泉石徬徨
不忍迴辭徑下扁舟重開贖樽罍江煙暝川谷水輪
出崔嵬水面映金波流光浮玉杯蕩漾洲渚間往來
恣徘徊一棹轉圓沙燈火來相催高歌賦厭厭會須
期再來又云盡日苦征賦公餘來放懷霽雲生怪石
宿雨溜懸崖鳥倦晨猶伏僧眠午未齋高人莫相笑

仙尉亦吾儕○又云城西廿餘里三堆山三峰插漢
高閣憑空有古石像土人多遊焉昔耕者於山掘得
小銅版上鐫詩云塵世不我留身寄白雲浮若問真
遊處三山與十洲不知爲何代物○志云西北十五
里有華萼山有寺臨江厓上鐫滙瀾有斐四字唐范
崇凱書方輿勝覽華萼山距內江縣十里許唐范金
卿讀書處按范崇凱玄宗時獻花萼樓賦爲天下第
一鄉人榮之以賦名其山也其弟元凱亦能文時稱
爲梧桐雙鳳李太白贈范金卿詩云君子枉清盼不
知東走迷離家未幾月絡緯鳴中閨桃李若不言攀
花願成蹊那能吐芳惠好鳥相招攜我有結綠珍久
藏濁水泥時人棄此物乃與燕珉齊拂拭欲贈之申
眉路無梯遼東慚白豕楚客羞山雞徒有獻芹心終
流泣玉帝祇應自索莫留舌示山妻又范宰不買名
絃歌對前楹爲邦默自化日覺冰壺清百里鷄犬靜
千廬機杼鳴浮人少蕩折愛客多逢迎遊子覩佳政
因之聽頌聲白集又有青山橫北郭白水遶東城此
地一爲別孤蓬萬里征浮雲遊子意落日故人情揮
手自茲去蕭蕭班馬鳴一首志云亦送崇凱作也金
卿所居故址有卧碑鐫華萼樓賦剝落殆盡山之後

灣有金卿墓○志云石笋山治東南七十里有石如笋者三下圓上銳聳峙漢表清影沉江則長虹滿地新月初上則明燭當天形家謂爲邑之地軸以三堆爲天關云

名勝記卷之八

蜀中名勝記卷之九

閩中曹學佺能始著

成都府九

漢州

古語云大旱不旱蜀有廣漢華陽國志所稱蜀之淵府浸以絲雒者也陳子昂爲雒縣令張知古頌德碑云此邦膏腴利在江浸陶翰送孟浩然入蜀序云廣漢城西三十里清江夤緣兩山如劍中有微徑可入岷峨括地志云郡在水南故曰漢陽寰宇記云湔陽故城在州南一里湔陽漢縣以其爲湔水之所經矣

○圖經洛水在治東半里又名沉犀水水性剛宜淬
刀與信州葛溪同雒字元從水漢火德忌水故改從
雒范曄後漢書曰洛城南每遇陰雨常有哭聲聞於
府中和帝時陳寵爲太守勅縣宰收葬骸骨哭聲遂
絕三國志建安十九年先主攻雒城拔之襄陽馬良
書詣諸葛亮曰承雒城已下尊兄配業光國鬼兆斯
見者也○圖經鴈江在治北半里李膺記云張任與
劉璋子循守雒城任勒兵出於鴈橋戰敗卽此雁橋
東有嚴君平卜處土臺高數丈宋郭印卜臺記云故
老相傳州治形勢南高而北下多火災真君鑿井廛
間上憲七星杓指南方以厭勝之越千百年卜臺旣
已隳落而井之應輔星者亦多堙塞矣○益州記云
廣漢郡北一里半有犀橋卽白魚水也志云河出朔
口有白魚出焉在治東十里○錄異記云漢州赤水
有湧泉水脉五六自山下湧出因成大池流三二百
步可激碓磴漚爲大溪○志云治西五里石梯河源
亦出朔口河岸甃石如階級有石梯橋下出緇土可
代墨又云彌牟河在治西二十五里自灌口經州會
金堂峽俗謂之三水關矣○常道將云廣漢郡本治
繩鄉永和中陰平漢中羗反元初二年移涪後治雒

城王莽改曰就都公孫述名曰子同益州以蜀郡廣漢犍爲爲三蜀土地沃美人士俊又爲一州稱望樂史云漢州有西伍城宋元嘉年於舊伍城立新都國乃于城南別置西伍城焉○漢選廣漢太守每重德高俊表章禮物殊于諸郡前有趙護第五伯魚後有陳寵趙瑤皆公望也唐天寶初房琯以故相爲是州有舊竹亭鳴琴其上公去已久而李文饒劉夢得過其地思之不置形於詠歌德裕詩云流水音長在青霞意不傳獨悲形解後誰聽廣陵絃禹錫和云尚有竹間露永無棋下塵一聞流水曲重憶餐霞人鄭澣

和云石室寒飈警孫枝雅器裁坐來山水操絃斷弔餘哀○次律于治西鑿有西湖自題云高流纏峻隅城下緬丘墟決渠信浩蕩潭島成江湖結宇依迴渚水中信可居三伏氣不蒸四達暑自徂同人千里駕鄰國五馬車月出共登舟風生隨所如舉麾指極浦欲極更盤紆繚繞多死致夜盡情有餘遭亂意不開卽理還暫祛安得長晤語使我憂更除杜甫陪王漢州留杜綿州泛房公西湖詩舊相思追後春池賞不稀闕庭分未到舟楫有光輝鼓化尊絲熟刀鳴鱸縷飛使君雙皂蓋灘淺正相依李德裕月夕遊房太尉

西湖詩云丞相鳴琴地何年開玉徽偶因明月夕重
敞故樓扉桃李蹊空在芙蓉客暫依誰憐濟川楫長
與夜舟歸又云晚日臨寒渚微風發權謳鳳池波自
閱魚水運難留亭古思宏棟川長憶夜舟想公高世
志祇似冶城遊劉禹錫和云太尉留琴地時移重可
尋徽絃一掩抑風月助登臨榮駐清油騎高張白雪
音祇言酬唱美良史記王箴又云靜對煙波夕猶思
棟宇清卧龍空有處馴鳥獨忘情顧步襟期遠參差
物象橫自宜雕樂石爽氣際青城鄭澣和云木落漢
川夜西湖懸玉鈎旌旗還夜次舟楫泛中流目極想

前事神交如舊遊瑶琴久已絕松韻息悲秋又云林
端落照盡湖上遠風清水榭芝蘭室仙舟魚鳥情人
琴久寂寞煙月似平生一泛釣璜處再吟鏘玉聲嚴
公貺題漢州西湖詩鳳池才未盡餘思鑿西湖珍木
羅修岸冰光映坐隅琴臺今寂寞竹島尚縈紆猶蘊
濟川志芳名終不渝薛能題漢州西湖詩西湖天下
名可以濯吾纓況是攜家賞從妨半驛程嘗茶春味
渴斷酒晚懷清盡得幽人趣猶嫌守吏迎重餐逢角
暮百中喜詩成坐阻湘江謫誰爲話政聲文同題房
公湖詩一項清波四面平宛然唐相舊經營高秋林

木形容老落日樓臺綵繪明有景可尋蘭櫂遠無幽
不入竹橋橫二年所得官居樂肯厭頻來緩帶行陸
游題房公西湖詩房公一跌叢衆毀八年漢州爲刺
史繞城鑿湖一百頃島嶼屈曲三四里蘇轍題房湖
詩酒壓郫筒不用酤花傳五老出新圖此行真勝成
都尹直爲房公百里湖魏了翁題漢州房公樓記略
云成都宇文侯鎮廣漢之明年威行惠孚侯度聿修
廼作樓於郡之西湖名曰房公於以申懷賢尚德之
意樓故金龜亭緣陂翠澗橫陳夾翼而亭宅于虹橋
之左有樓其上端握要會矣華父又和宇文漢州乞
房樓記詩云房公曾中妙刀尺剪刻玻璃貯寒碧今
侯着樓於其上竹色荷光得良覲詩來殷勤問故侯
別日雖賒情轉密因思當年飛蓋遊鷗鷺不驚潛鯉
出春濃雪絮人影亂秋老雲松半天屹蘇公二十四
橋月尚愛西湖風月夕江山好處餘戀繆縱不卽人
人自卽况今簷椽雲與齊激楚高歌朋友集向來寒
乞翻自嗤詩掃黃泥已無迹功名老我後加鞭文字
餘人先奪席欲搜萬象供刻畫自有此湖難此筆終
當爲君記斯遊摹寫蒼顏真六一按金龜亭者僞蜀
武成三年庚午六月五日癸亥廣漢太守孟彥暉奏

西湖有金龜徑寸遊於荷葉之上畫圖以獻故以之名亭也○丹淵集云聶侯友仲立漢州學制度宏侈爲二蜀之冠當時不知何所得巨石置講堂之後質狀怪偉勢若飛動昔孟氏僭竊苑囿所蓄者皆寧武軍節度使顧璘所進昶旣面縛是物亦散落民間余在成都往往見於好事家園館凡自璘許來者一一皆具欵勒此非耳而其完厚瓌詭上下可愛雖到茂灌牛奇章號爲好事諒亦未嘗見此者也治平丙午秋余視郡進士試於此旦暮環繞其下歎惜之不足乃爲之銘其辭曰廣漢學宮後有奇石礫砢一抱嶽峯九尺怒蜃驤首狂龍轉脊擎空將翻壓地欲坼神乳溜腹老苔漬額堅包勁脊潤吐活脉誇殺羽人詠窮墨客敢告存護千古怪碧與可又有題漢州王氏林亭詩云短笻疎籬入野扃竹煙松露滿襟清奔湍激險飛寒響弱蔓穿深挂短英惜去更觀曾畫壁記來重注舊題名門前便是紅塵道誰肯同過洗俗纓亦皆韻事也

什邡縣

寰宇記云什邡本漢舊縣屬廣漢郡舊置在雍齒城今於城北四十步立縣雍齒卽漢什邡侯也墓在縣

南一里李膺記云雍齒墓高四丈闊四畝有石麒麟
二○志云今縣治乃唐紫極觀地也廳左衛真人墓
在焉觀前舊有水西南流名老君洗腸溪真人乃衛
元嵩雲笈七籤以爲有舊碑刻存矣○寰宇記云南
陽郡故城在縣西二十三里李膺記云漢中李雄亂
蜀遣李壽盡掠漢川五千餘家流寓於此晉太康元
年立南陽郡後魏三年廢南陽郡南七里有新婦水
故老傳云昔有新婦勤於侍奉負汲水遠不辭冰雪
泉爲之涌出故曰新婦水流合廉江水○志云治北
六十里高境關關外卽章烙山亦曰章山又曰洛通
又曰楊村諸山物產出焉華陽國志謂大姓楊氏之
所居矣山有風洞卽之氣冷有火洞卽之氣熱古老
傳云符堅有子避難死於洛通山卽此○古碑云江
水出高境關大郎廟前始大放分流十支又云自章
山內合五溪而總名洛江出章山分洛江爲十河縣
之名卽從起也○華陽國志李冰導水於洛通山志
云章山後厓有大家碑云秦李冰葬所按開山記云
什邡公墓化上有升仙臺爲李冰飛昇之處古蜀記
謂李冰功配夏后升仙在後城化藏衣冠於章山冢
中矣○方輿勝覽云治西五十里有大蓬山高崖矗

天而立瀑布飛落最爲奇觀有保聖院紹興中謝中
大蓬山記略曰嘗自紫微度綿水覺佳氣逼人竹木
蕭蕭臺殿聳岌松根寒泉流注不竭懸厓萬仞瀑布
如線山腰有大小白厓甚奇上有太子宮遺址僅存
而事迹不可攷厓下有洞極深邃中有石柱撐之左
右映出白龍十三蜿蜒如畫又自西越澗行一里有
馬師井捫蘿陟磴至峰頂有石室可坐百人蝙蝠大
如鳥所謂扁蝠洞者也北望龍居其狀如偃月有保
聖寺唐天福中鏡錚禪師誅茆之處其曰馬師卽馬
頭陀與師同時者○本志云大蓬山朝雲初起日射

圓光於山頂覩佛臺西澗光暈數重作青黃紅綠色
稍升象王峰大徑百丈中有黑影彷彿佛像食頃方
散山高百里六月積雪不消國朝明本禪師因名爲
瑩華山○高僧傳馬祖什邡人志云北郭羅漢寺唐
中宗時馬祖出家之處山門右有說法臺臺角有井
皆祖所創○勝覽云龍居山在什邡縣有等慈院飛
瀑千尺虛亭屹然橋橫路轉高栢擁翠志云龍居寺
隋建旁有神龍潭其右爲蜀王孟知祥墓也孟昶攜
花藥夫人至寺避暑寺僧水觀禪師先一月預知之
因賜號爲預知馬○成都叅軍任愿蜀王廟記云什

蜀中名勝 卷之九
邠之西行十許里有古佛寺曰南陽宋大明中所建也後周沙汰寺廢隋文帝以皇子秀爲蜀王王以暇日獵至寺廢址有兔逸入壠中發壠得石像甚巨於是卽其舊址復爲寺以像寘其中時有進禪師者善水觀王異之從問道得大無礙今寺之左有王祠祠下有泉滙爲陂浮於方亭達出於雒其發源流百許里漑田數十萬頃雖大旱民不告病其爲利可謂深且博已卽泉之始則進禪師水觀之餘波也李白冷泉亭詩惜彼落日暮愛此寒泉清西暉逐流水蕩漾遊子情空歌望雲月曲盡長松聲志云亭在南陽寺矣

德陽縣

地理志云東漢分綿竹置德陽寰宇記云綿竹縣故城在縣北三十五里李膺益州記云石子頭二十里卽故綿竹縣諸葛瞻埋人脚戰處也○樊真公德陽錄略曰邑西南石亭江畔有石亭寺江畔有石亭因以名江晉李特李流軍綿江趙廞遣費遠斷北道屯綿竹之石亭是也德陽學宮有石版陰陽書缺根因石阜以庭宇跨飲江之鼇鼉岌飛簷與鐵柱插清江之齋淪眩古潭之百尺涵萬象於瑤崑耿月鳧以終

夕湛天容之方春信蒼蒼之非色極深遠而自然疑
貝闕與珠宮有玉函之老人予南征其萬里友魚鰕
與蛭螾逝將去而反顧託江流以缺首末無顯名其
字盈版字勢適勁似王稚子墓前石闕漢人書法也
繹其文意似爲石亭而賦或三版四版今存一版斷
文矣○縣一名旌陽晉太康初許遜爲旌陽令屬歲
大疫死者十七八遜以神方拯治之符咒所及登時
而愈蜀民爲之謠曰人無盜竊吏無奸欺我君活人
病無能爲本志云東關內有旌陽井許真君浴丹於
此其水香冽暑飲尤宜半倚江岸漲減不崩○治有
三造亭李膺記云秦子勅之舊宅也太守夏侯纂三
造門故以爲名其宅綿水衝毀僅有餘跡○南偏有
善果寺晉泰始中建唐名善寂寺王勃碑記以爲梁
武帝所建矣○寰宇記云縣北五里有鹿頭山自綿
州羅江縣來迤邐入縣界古老云昔漢有張鹿頭於
此造關因以爲名杜甫鹿頭山詩云鹿頭何亭亭是
日慰饑渴連山西南斷俯見千里豁遊子出京華劍
門不可越及茲險阻盡始喜原野闊殊方昔三分霸
氣曾間發天下今一家雲端失雙闕悠然想揚馬繼
起名碑兀有文令人傷何處埋爾骨紆徐脂膏地慘

澹豪俠窟仗鉞非老臣宣風豈專達冀公柱石姿論
道邦國活斯人亦何幸公鎮踰歲月○其下有龜勝
山道場乃高崇文破劉闢處初闢據鹿頭關高與之
對壘屯營有神龜由壁門來蹲於牙旗之下公命投
之遠矚翌日復至議者以龜介蟲之長介胄斯服蜀
有龜城其城是師果爲受降之兆乃以龜勝名山立
道場焉掌書記鄭宗經大唐乙酉明年六月記○本
志云治北十里秦中治天下第七治也上應箕水豹
王逸少嘗欲遊焉石洞產九節菖蒲秦時韓仲修煉
之所此雲笈七籤所載以爲其山浮寰宇記云浮中
山在縣北三十里益州記云南陰平鄉東有浮中山
每芳春遊人登賞謂之迎春岡四面斷絕也○錄略
云縣東南有鄧林禪院按邑人公孫輔記云吾鄉精
藍之勝鄧林爲第一其地蓋起於縣洛之左宛若秦
川隴坂高下起伏北包靈龕南亘旌邑直走於瑩華
之東南楓楠柞柏拔地倚天蔚爲鄧林東山襟其前
江水帶其中川原綺錯雲煙出沒飛鳥上下農夫耕
穫樵牧往來庭戶間皆一覽而有也真公以名從大
將軍鄧芝而起者非鄧芝欲居德陽乃遂寧縣

綿竹縣

蜀中名勝 卷之九
綿竹漢縣地理志云紫崑山綿竹所出有綿水流注
謂之綿堰口矣寰宇記云綿竹縣舊屬廣漢郡隋開
皇三年徙晉熙郡城改爲晉熙縣十八年改爲孝水
縣以境有姜詩泉焉高僧傳南武都今之孝水縣也
蓋縣北三十里紫崑山極高大亦謂之綿竹山亦謂
之武都山○唐吳融綿竹山詩云綿竹東西隅千峰
勢相屬峻嶒壓東巴連延羅古蜀方者露圭角尖者
鑽箭鏃引者蛾眉彎斂者鳶肩縮尾蟻青蛇盤頸低
玄兔伏橫來突若奔直上森如束歲在作噩年銅梁
搖蠶毒相國京兆公九命來作牧我提虎僕毛專奉

狼頭燻行府寄精廬開牕對林麓是時重陽後天氣
曠清肅茲山昏曉開一一在人目霜空正次寥濃翠
霏撲撲披海出珊瑚貼天堆碧玉俄然陰霾作城郭
纔霖霖絕頂已凝雪晃朗開紅旭初疑崑崙下天矯
龍銜燭亦是蓬萊巔金銀臺疊蹙紫霞或旁映綺段
鋪繁褥晚照忽斜籠赤城差斷續又如煮吳鹽萬萬
盆初熟又如濯楚練千千匹未軸又如水精宮蛟螭
結川瀆又如鍾乳洞電雷開巖谷丹青盡不成造化
供難足合有羽衣人飄飄曳煙躅合有五色禽叫嘯
含仙曲根雖限劍門穴必通林屋方諸滄海隔欲去

憂淪覆羣玉縹緲間未可量往復何如當此境終朝
曠遐矚往往草檄餘吟哦思幽獨早晚掃欒槍笳鼓
迎暢轂休飛霹靂車罷繫蝦蟆墓木勒銘燕然山萬代
垂芳郁然後恣逍遙獨往羣麋鹿不管安與危不問
榮與辱但樂濠梁魚豈怨鍾山鵠紉蘭以圍腰採芝
將實腹石牀須卧平一任閑雲觸○綿竹山有鹿堂
致卽二十四化之第二化也漢元帝時老子偕張道
陵遊此有仙基仙宮古人度世之處李膺記云山崖
有隙出神泉若詣者精志則泉流奔涌其信道不篤
便清源頓竭也又有庚除致爲第六化方輿勝覽云

山有二石室三國初有霽雲子者入洞中見樓臺金
碧門者呵止之曰子凡骨可亟去不然及禍霽雲子
出後再至遂迷路矣○武都山有玉妃溪成都耆老
傳載妃與五丁同生父母棄之溪後聞呱呱聲就視
乃一女五男五女卽蜀妃男卽五丁故華陽國志云武
都山精化爲美女也○山下有巖真觀乃君平父嚴
子晞所剏楊天惠記之甚詳見神仙傳又有君平池
古老傳云君平拔宅上昇基陷而成池○武都山有
惠淨寺梁太清年建唐貞觀九年寺西院立七佛堂
一僧舍王勃爲之銘曰武都仙鎮靈墟輿域邑動香

城山開淨國澗流百道峰雲五色谷暗藤斜山高樹
逼千楯鶴列萬拱星懸分林構趾接磴開屢臨階竹
樹遶棟風煙龕前怪石塔下秋泉綠崖疏逕青岑拒
室霧道相縈煙房互出葉濃磎淨花深嶂密鳥度難
尋猿驚易失簷分石竇地絡金沙丹丘抗月碧洞棲
霞松開野路桂列山家金鑪栢葉寶座蓮花砌因巖
曲橋隨峰返果出天厨香來仙苑玉鑄啓曙金鐙照
晚谷思鐘長山悲鐸遠閭閻踐勝銅墨高情聲飛別
邑望動專城懸金道肆刻石山楹千載之後吁嗟令
名○又有響應寺在馬跪溪相傳隋蜀王秀妃患心

疾召寺僧法進不往王怒親往加罪之所乘馬至溪
邊而自跪若爲之請者因名馬跪溪高僧傳唐武德
初釋世瑜獨住此山有四猿供給山果等食初惟一
泉後有三泉流出於下俗謂之三溪河也亦名射水
河相傳蜀王秀營軍於此乏水王乃築臺望三溪山
下發三矢有三泉從石竇出遂成河流又有馬尾河
注之河出無爲山宋淳熙間有碑云羣鴈排空成無
爲二字因名有河水出焉流如馬尾因名馬尾河也
○志云綿竹故城有二其一爲宋時築在郭外西南
隅近龍頭橋卽湖橋也魏華父湖橋記曰知縣宇文

西叔峒度地飛鳧門外瀦爲湖周廣六十有五丈伐石爲四砥柱崇四尺架橋其上而屋之衡從合十丈以通南北車徒之往來蓋紹定四年碑也其一爲漢城卽德陽之西界華陽國志稱汎鄉有孝子姜詩田地宅是矣姜詩廟曰孝感鄭少微記略云漢州德陽縣西北四十里有鎮東漢姜詩故宅在焉故號姜詩鎮治平中知綿竹縣事郭震謂士游行甚高宜諱其名白部刺史易之鎮遂號孝泉然廟猶因俗爲呼於是開州司理叅軍白壽朋與鄉之士民列於縣曰姜詩夫婦事跡最詳於漢史舍側湧泉至今不絕民賴灌溉或遇旱厲禱焉輒應其厚俗利人之功居多廟額獨未蒙賜敢請縣乃上之有旨賜名孝感命至之日稚耄夾塗載舞踊躍爭觀爲人子若夫者咸欲詩之行在其身也爲人女若婦者咸欲龐氏之行在其身也爲人父母若舅姑者咸願有子如詩有女有婦如龐氏也則又相與詫於他州之民曰吾鄉雖僻幽而姜詩夫婦乃吾東家子也爾州曾有是耶方且侈上之賜以永稱厥名云爾

綿州

元和郡縣志云按州城理漢涪縣也去成都三百五

十里依山作州東據天池西臨涪水形如北斗卧龍
伏焉梁天監中張齊賢爲太守更造樓櫓却敵有東
西門東門久塞富樂山氣所衝門開則喪亂宋元嘉
初太守王懷素開之果致喪敗爾後復塞○輿地碑
目云漢刺史李頓碣在綿州又云州治十賢堂繪涪
翁龐統蔣琬杜微尹默李白陳該蘇易簡王仲華歐
陽脩共十人又云綿州通判廳有伐木堂鮮于子駿
立文與可記陸務觀劍南詩藁云姜楚公畫鷹在綿
州錄叅廳杜少陵有詩輿地紀勝云六一堂在司戶
廳舊爲推官廳昔歐陽文忠父鄭公觀嘗爲推官公
實生茲地○方輿勝覽云越王樓在城西北唐顯慶
中太宗子越王貞爲刺史建杜甫詩綿州州府何磊
落顯慶年中越王作孤城西北起高樓碧瓦朱甍照
城郭樓下長江百丈清山頭落日半輪明君王舊迹
今人賞轉見千秋萬古情刺史喬琳詩三蜀澄清郡
政閑登樓攜酌日躋攀頓覺胸懷無俗事迴看掌握
是人寰灘聲曲折涪州水雲影低銜富樂山行鴈南
飛似鄉信忽然西笑向秦關唐詩紀事王鐸與綿州
守于興宗登越王樓以詩寄朝士云謝朓題詩處危
樓壓郡城雨餘江水碧雲斷雪山明錦繡來仙境風

謠入帝京恨無青玉案何以報高情刺史樊紹述越
王樓詩序云綿之城帝獨歔掀明威瀾石硝馳涪瀨
左陵凌紅穠簪天地送行癸壬且掬跼踖於西北蟠
紅顏青越王貞故爲樓重軒疊飛門明牕蒙傘蹇蹇
予始登謂日月昏曉可窺其背雷電合風雲遘霜辛
露酸星辰介行神鬼變化草木顯繡髻銜葦芟皆可
察極旣縈視其江帶又極視其土岡斷暴遠近山嶽
嶽若閔之東皇天原開見荆山我其黃河矚然爲曲
直淚雨落不可掩因口其心曰無害若其日杲星星
過歸尚悲不能解重爲詩以釋益不可顧謂郡中諸

君能無有意綴以華艷其念蓄云詩曰危樓倚天門
如闔星辰宮榱薄龍虎怪洄洄繞雷風徂秋試登臨
大靄屯喬空不見西北路老懷益凋窮石瀨薄濺濺
土山杳穹穹昔人愴爲逝所適酡顏紅今我茲之來
猶校成歲功輟田植科畝遊園歌芳叢地財無聚厚
人室安取豐旣乏富庶能千萬慚文翁○勝覽云江
樓枕城之東隅上有唐時江亭記杜甫送嚴侍郎到
綿州同登杜使君江樓宴詩野興每難盡江樓延賞
心歸朝送使節落景惜登臨稍稍煙集渚微微風動
襟重船依淺瀨輕鳥度層陰檻峻背幽谷牕虛交茂

林燈光散遠近月彩靜高深城擁朝來客天橫醉後
參窮途衰謝意苦調短長吟此會共能幾諸孫賢至
今不勞朱戶閉自待白河沉○文苑英華王勃綿州
北亭羣公宴序云下官人間獨傲海內少徒志不屈
於王侯身不縛於塵俗孤吟五嶽長嘯三山昔往東
吳已有梁鴻之志今來西蜀非無張載之懷況乎踐
名場攜勝友風月無幾琴酒俄垂半面十年一別千
里何少府故人攀桂撫金石而論心韓法曹新餞班
荆臨江湖而執手離亭北望煙霞生故國之悲別館
南開風雨積他鄉之思於時蒼雲寡色白日無光沙
塵起而桂浦昏鳧鴈下而蘆洲晚傍鄰蒼野霜飄橘
柚之園斜枕碧潭日斷芙蓉之水旣而登臨惜別駮
駕少留季札何人親逢贈編子荆不慙思掛傾城惆
悵北梁揖琴臺而漸間徘徊東道思錦署以行遙嗟
乎人事乖矣江山遠矣請命離前之筆爲題別後之
資五際飛文想羣公之不讓一言有贈知下筆之有
神○盧照鄰綿州官池贈別詩云輜軒遵上國仙珮
下靈關樽酒方無地聯綵喜暫攀離言欲贈策高辯
正連環野徑浮雲斷荒池春草斑殘花落古樹度鳥
入澄灣欲敘他鄉別幽谷有綿蠻○本志云巴字水

在治西四里涪水自北經城西而析爲二安水自東
迤邐繞城東南匯之芙蓉溪成一巴字每江漲登山
望之點畫天然甚肖也芙蓉溪卽東津杜甫觀打魚
歌是此處子美又有巴西驛亭觀江漲呈竇使君詩
云宿雨南江漲波濤亂遠峰孤亭凌噴薄萬井逼春
容霄漢愁高鳥泥沙困老龍天邊同客舍攜我豁心
胸唐庚芙蓉溪詩云人間八月秋霜嚴芙蓉溪上春
酣酣人間二月春光好溪上芙蓉迹如掃小兒造化
誰能窮幾回枯枿還芳叢只應人老不復少有酒且
發衰顏紅○李膺益州記云金山在涪縣東五十步

東臨澗水光采映川長七八里每夏淹雨金粟散出
○州東五里有靈山郡國志云昔有神女於此擣衣
山南絕巖有方石明瑩謂之玉女擣練砧也○周地
圖記云富樂山高廣爲衆山之秀登之望見州內勝
覽云在巴西縣東五里劉先主入蜀劉璋延於此山
望見蜀之全盛飲酒樂故得是名又有石盆山迎真
觀卧佛院洞靈觀俱在此山之麓雍有容詩當時四
海一劉備至此已堪悲失脚出語翻爲樂國想是人
止可徧方著大漢曾封隆準翁聞道山河錦繡中安
能鬱鬱久居此睥睨三秦日欲東唐子西詩富樂之

名誰所留建安年中劉豫州擁兵入蜀萬貌貅孱璋
送國來迎頭軍中醜酒椎千牛肉如巴山酒如涪酒
酣握手登高丘極目紫芋蹲春疇冉木震富樂山移
文云星車熒熒駕風鞭霆出霧入雲回翔太清是爲
古富樂之英方劉豫州置酒高會於吾山也升高延
佇虎視徜徉沃野綿亘鬱乎蒼蒼曰富樂哉有德易
王其興勃然唐高宗顯慶中建坎山上奠簡江臯瑞
氣凝於翠嶺祥光爛於丹青武宗會昌中投金鮫室
沉璧龍淵雲鶴降以飄飄天花舞而蹠蹠石刻長存
於今屹然○碑目云富樂山有唐乾符間王助碑又

有集古堂淳熙間史祁建悉舉近郭仆碑植於堂之
左右而繪像於堂中渭川王讓記略云西絕涪水有
山曰栢下諸葛公營壘在焉而喬木婆娑者蔣公琰
萬秋之宅鍾士季之所嘗致敬也○漢書郭玉傳涪
翁者左綿人肥遯不出姓名所居處爲漁父村玉從
之受易焉本志州南四里有巖卽涪翁山也宋別駕
楊叔蘭書涪翁山三字刻於石併刻弔涪翁詞○益
州記云猿門山在涪縣之北二十五里上多猿其峰
磔豎如門故曰猿門○寰宇記云鹽泉縣漢涪縣地
後魏於此置魏城縣唐武德二年分魏城置鹽泉縣

以地有鹽井民得採澆爲四方賈售之地蜀都賦云
家有鹽泉之井取此爲名羅隱魏城逢故人詩一年
兩度錦江遊前值東風後值秋芳草有情皆礙馬好
雲無處不遮樓山將別恨和心斷水帶離聲入夢流
今日因君試回首淡煙喬木隔綿州○成都文類魏
城縣南五里有長嶺高涼泉出焉其始至也則風於
一山玉溜潺湲衆籟成吟笙竽匪禁登之洗然如謁
羣仙心意自殊若與道俱橫石如隕匪塹匪鑿傍架
絕壁根山不落上摩層霄屹然峩峩其間可俯而入
焉則崆峒博敞如堂如室苔駮古壯奇怪生妍旋開

混元益偉造物然則始知乎山林獨得之士一丘自
足窮年忘歸亦何必際耕父於清泠送白日於昧谷
然後爲異也傍有舊銘隱磷餘字卽久視元年崔司
業融守涪茲邑高禔致禱刻石斯存矣元和元年侍
御史李汭記○州南百里界於潼川四山如城涪水
經乎其中漢設涪城縣於此三國志昭烈自葭萌襲
蜀進據涪城是也杜甫涪城縣香積寺官閣詩云寺
下春江深不流山腰官閣迥添愁含風翠壁孤雲細
背日丹楓萬木稠小院回廊春寂寂浴鳥飛鷺晚悠
悠諸天合在藤蘿外昏黑應須到上頭○按李雄春

蜀中名勝 卷之九
秋巴蜀謠曰譙登治涪城文石在巴西張羅守合水
巴氏那得前是涪城與巴西向爲犄角之地予以萬
曆壬子陽月過此有羅漢寺是舊縣址

羅江縣

寰宇記曰縣本廣漢涪地晉於梓潼水尾萬安故城
置萬安縣李雄之亂移就潺亭今縣城是也○註水
經曰潺水出潺山歷潺亭而下注涪水今縣北二里
有潺亭故址舊經云有唐開元二十四年立潺亭碑
文字磨滅尚有潺亭二字碑陰有宋邑令太常博士
宋彥嘉書云嘉祐三年予始署邑事明年訪古迹而

潺亭廟有遺址存焉東南百步有碑仆於民田中其
潺亭二字亦不復覩稽其址歷數百年廟與碑俱廢
是神之祀於民者不亦闕乎且俟因官之美材而復
廟貌未幾里民請自修之次年廟成秋大早晨禱而
夕雨自是潺之民益靈其神相與輓碣揭之祠下時
嘉祐五年也○圖經唐明皇幸蜀至萬安驛歎曰一
安尚不可況萬安乎乃迴輦宿於真明寺按驛在治
西一里昔有碑書一安且不可句云是玄宗親筆今
亦毀蝕宋張縝詩云勁兵重鎮付胡奴鷓雀鷓魚計
自疎地入萬安知幾許却憐此邑始回車○志云玄

宗入蜀縣令造亭於北一里祇候土人呼爲接王亭遺址猶存北三里又有企僊亭乃車岩上昇處宋師堯俞作記○寰宇記云縣西南十里有羅嶺山羅公遠隱居之處山下有洞號真人宮又有龍池山山上有池池有伏石如龍蟠也○碑目有文鐸書龍洞仙踪壁刻云太白山道人李洞賓以太平興國五年龍集庚辰仲春乙丑朔越十二日奉勅賫內庫乳香二十斤詣靈山相度仙洞焚燒初抵劍門邁老人之告闕次離巴岸逢孤鶴以來迎及屆洞中睹雙童之出入已臻巖下見玉輅之踪由又聆音樂淒清螺鈸竦越若非吾道神變其孰能與於此乎勒於洞門以爲他年會語張本○真誥云羅江大霍有洞臺中有五色隱芝陶註曰此洞爲南真及司命所任之處志云大霍山在縣西南十里羅公遠修真處也上有羅真宮宋何彥真有記外志云大霍山麓有丈餘磐石耕者每宿其上輒夢云接引佛上可卧耶驚以告寺僧掘其下果得像若天成不事雕琢者○碑目有元人廣琬東山寶明寺碑曰東山巔有景樂寺迺唐高宗神龍中所建宋大中祥符初改今名相傳十三尊者遊戲之所也在縣東偏一里○古蹟志馬馳寺有井

在山谷中四時水溢可以灌田近日忽枯涸土人浚之得龍首骨及大珠如卵光同水晶閃爍奪目衆競視之忽然雷震珠復墜於井中○寰宇記白馬關在羅江西南十里與鹿頭關相對志云山上平坦有小徑僅容車馬三國時營壘也其下名落鳳坡按鳳雛先生龐士元侍昭烈至此卒於流矢下其葬在鹿頭關桃花溪東岸墓右有龍洞葬時人見白馬自洞中逸出舊有白馬關巡司

彰明縣

寰宇記云縣治初在清廉鄉梁大同四年移於讓水

鄉宋書范栢年梓潼人明帝語次問卿鄉土有貪泉否栢年曰臣梁益間有廉遜水不聞有貪泉帝嘉之卽拜蜀郡太守按廉水在縣北平地出泉或云飲之生廉遜故名○吳曾漫錄彰明縣清廉鄉有李白讀書堂後廢爲隴西院蓋以太白系出隴西云院後有太白像○李翰林墓碑云白本宗室子其先避地客蜀居蜀郡之彰明太白生焉彰明邑有大小匡山大匡乃白讀書處圖經梓州刺史于邵作李白碑在縣之寧梵寺三門下志云碑在縣南二十里卽白故宅○按匡山在縣北三十里後改康山疑宋世避藝祖

祖諱併杜詩而改之也杜甫寄李白詩不見李生久
佯狂真可哀世人皆欲殺吾意獨憐才敏捷詩千首
飄零酒一杯康山讀書處頭白早歸來一云宋改匡
山爲翰林山○方輿勝覽大匡又名戴天山白集有
訪戴天山道士詩犬吠水聲中桃花帶露濃樹深時
見鹿溪午不聞鐘野竹分青靄飛泉掛碧峰無人知
處所愁倚兩三松○李膺益州記云自戴天山向西
連接爲石磬山週三十里山有石室口方丈三尺內
有石牀四面高一丈有懸石如磬擊之聲聞數里下
有流泉甘冽可酌○寰宇記曰孟津山在縣東南一

里自十八隴山而來西魏自讓水鄉移縣於孟津里
是也○三洞羣仙錄黃奉先移家入蜀隱太華山山
盛牡丹奉先栽蒔盈籬春時花開望之如錦幃然在
治北五里○杜光庭錄異記綿州昌明縣竇圖山真
人竇子明修道之所也西接長岡猶可通車馬東臨
峭壁陡絕一隅自西壁至東峰石笋如圖兩岸崖中斷
相去百餘丈躋攀絕險人所不到其頂有天尊古宮
不知建始年月古仙曾竿繩橋以通登覽而絙竿朽
絕已積歲年里中諺曰欲知修續者脚下自生毛如
此相傳久矣咸通初山下居人有毛意歡者幼知道

常持誦五千言不輟口着敝布褐日於市誦經乞酒
醉而登山攀緣峭險以絕道爲橋山頂多白松樹以
繩繫之橫亘中頂布板椽於繩上士女善者隨而度
焉行及其半動搖將墮而其底不測莫敢俯視數年
繩朽橋壞無復緝者咸通壬辰邑令與賓客醮山登
西峰展禮時毛師他游人有謂令曰此峰側有小徑
抱崖纔通人跡無所攀援意歡常從此去逾旬而出
令疑其隱在穴中座上有廣陵郭頭陀者令請由徑
往探之頭陀去久之始還驚胎不能語已曰此徑去
約三十餘丈然後到一穴口纔三五尺下去平地猶

數百尺穴內可坐十餘人中有巨木匱緘鎖極固其
誦經處石面平滑有足膝痕經卷在焉不知意歡所
之意歡有一妻一女每持燈枕度繩橋山側居人見
之以爲非常山多毒蛇猛虎人莫敢獨往意歡雖夜
歸亦無所畏常有二鴉棲巖下客將至鴉必飛鳴意
歡乃整飾賓榻未畢客果至矣○高僧傳云綿州城
西北四十里竇圖山梁大同中僧林所居也山北涪
水之陽素來無猿自林師棲託便有兩頭依林而住
有初見者云渡水來及後林出山門猿還泗渡如此
非一年月淹久孳乳產生乃至數十有時送林至龍

蜀中名勝 卷之九 二十六
門口佇望而返○方輿勝覽云猿門自縣北特起去縣二十里山多猿兒嶮固如門舊有猿門戍瑯環記云啼猿之地多巖而縣於是有巖山矣○郡國志云彰明縣巖山有鍾乳穴十九又西岸有自然石塞其下流水上有一懸石似磬擊之有聲○寰宇記云彰明有附子山自松嶺關東來去縣四十里山出附子其水亦名附子水○勝覽云彰明縣有李膺墓西南去州四十里按膺涪城人梁時爲益州大中正卽撰益州記者

安縣

寰宇記云龍子山自漢州綿竹縣東入縣界亦謂之龍安山也志云縣北十里龍安山有蜀王秀避暑亭清泉修竹餘韻猶存矣○元中統間升石泉軍爲安州以神泉西昌爲輔邑神泉卽今神泉壩西昌卽今花街鎮舊址尚可攷○神泉者郡國志云縣西三十里有泉十四穴甘香異常痼疾飲之卽差故曰神泉今有祠勝覽云銀線潭在神泉縣南山相傳白龍潛泳其間水面有銀線一痕以物撓之卽不見波定如故也○西昌舊名益昌縣括地志云城西十里地名木柵有益昌縣者此矣唐永淳年以利州有益昌故

蜀中名勝記卷之九
改爲西昌縣取西昌山在縣北山特起舊名馬鞍天
寶六年勅爲西昌山也

蜀中名勝記卷之十

閩中曹學佺能始著

川西道

龍安府

平武縣附郭

顧野王輿地志云陰平縣本漢梓潼縣地晉人流寓
於蜀者仍於益州立北陰平郡西魏廢帝二年定蜀
改北陰平爲龍安魏志景元四年諸軍攻蜀鄧艾自
陰平行無人之地七百里鑿山通道作橋閣山高谷
深至爲險難艾以氊自裹縛而下將士攀木緣崖魚
貫而進先登至江油卽此地晉於此置平武縣○志

云唐宋之龍州在雍村埧梁李龍遷築城於此魏置州遺址尚存雍村埧者宋紹定進士郡人雍繁孫有文學見所製文昌祠碑村因此名今之郡治則樂平鎮也蒲規修造記云通階秦路嚴禁出入與劍門關爲比矣○唐許棠送龍州樊使君詩曾見邛人說龍州地未深碧溪飛白鳥紅旆映青林土產唯宜藥王租只貢金政成閑宴日誰伴使君吟李洞送龍州田使君詩御札軫西陲龍州出牧時度關雲作雪挂棧水成澌劍淬號猿岸弓懸宿鶴枝江燈混星斗山木亂槍旗鎖庫休秤藥開樓又見詩無因陪宴集吟苦

憶京師項斯龍州與韓將軍夜會詩庭綠草纖纖邊州白露沾別歌緣劍起客淚是愁添見月猿啼樹迴風雪滿簾將軍盡尊酒樓上賦星占李洞亂後龍州送鄭郎中兼寄鄭侍御詩侍車登疊嶂經亂集鴿原省壞蘭終潔臺寒栢有根縣晴江入峽樓靜雪連村莫隱匡山社機雲受晉恩又龍州送裴秀才詩違拜旆旗前松陰路半千樓衝高雪會驛閉亂雲眠榜掛臨江省名題赴宅筵人求新蜀賦應貴浣花牋宋邵稽仲詩峭壁陰森古木稠亂山深處指龍州猿啼鷓噪溪雲暮不是愁人亦自愁○方輿勝覽龍州倅廳

有吏隱堂僉判趙衆詩滿耳江聲滿目山此身疑不在人寰民舍古意村村靜吏束刑書日日閒司馬君實和云四望逶迤萬疊山微通雲棧訪雲鬟誰知吏道堪棲隱未必人間有此閒范景仁和云花陰掃榻常欹枕月色侵門不下關因諷君詩想佳景夜涼依約夢魂閒○寰宇記云龍穴山在陰平縣東北五十里古老相傳此山有龍鬪死血變爲石宋齊於此置龍血戍李膺益州記云龍血東有龍像巖絕壁約萬餘丈有四石龍在壁間今尤可驗巖之東北有洞穴莫測深淺泉出其下○又云馬閣山在陰平縣北六

十里北接梁山西接岷峨昔鄧艾伐蜀從景谷路徑龍州江油縣至此懸崖絕壁乃束馬懸車作棧閣方得路通因名馬閣山○龍門志云竇子明遇仙處在縣西北九十里今仙女舖是宋理宗寶祐間有人於小溪山下見二女子冉冉升雲而去異香經日不散龍安新志又云仙女洞在治南江村口山勢盤旋巖洞深邃水自中出百里流入劍南故老相傳每風日清和遙見仙女靚粧游行巖上或理髮或浣衣於洞壑中隱顯不常人跡罕到洞中石乳融結狀甚奇怪色如碧玉取可供玩也○道教靈驗記云梁武陵王

紀理益州使李龍遷築城於牛心山龍遷既歿便葬山側鄉里立祠號李古人廟唐初改爲觀其後武氏革命鑿斷山脉明皇幸蜀有老人蘇坦奏曰龍州牛心山國之祖墓今日蒙塵之禍乃則天掘鑿所致明皇卽令刺史蘇邈併工修填如舊明年誅祿山復宮闕至德二年乃升龍州爲都督府號靈應郡僖宗幸蜀宗子李特請遣道士醮山祈福禮有加焉按唐書高祖紀七世祖曰暲爲梁昭武王生歆歆生重耳重耳生熙熙生天錫天錫生虎虎生昞昞生淵是爲高祖虎當西魏時賜姓大野氏是虎祇仕西魏亦非仕梁也此說不知何據○陰平修路記云龍安棧閣在治東者曰石城曰佛厓曰麻園曰墓頤曰黃林曰三店原曰七里卽左檐也曰飛仙已上凡八在東南者曰石回曰興文卽袁烈婦投厓處曰猿臂在東北者曰秦隴曰東閣已上凡五在治東者曰金鼓以形肖也曰芭蕉曰楮株曰盧厓監司盧姓者所修曰天井曰桑坪曰兜索曰木蕊曰飛泉已上凡九在治西北者曰金匱曰桐油曰隆奉曰胡空曰黃梗曰劉村曰鵝頂曰禪峰曰石門曰仙女曰馬桑曰溪壩曰黑水曰羅漢曰羊腸已上凡十有五

江油縣

古江油郡及縣今平武之江油舖是以江水所由矣
元遷江油於武都興教鎮則今縣也○方輿勝覽云
太白臺在江油縣太白與江油尉往來故有臺在尉
亭蒲翰爲之記其贈江油主簿詩云嵐光深院裏傍
砌水泠泠野燕巢官舍溪雲入古廳日斜孤吏過簾
捲亂峰青五色神仙尉焚香讀道經爲米芾書刻在
縣衙志云縣西三里有山接彰明界高聳亭亭形如
匡字此大匡山也又云南二十里點燈山卽彰明之
小匡山上有太白祠矣○寰宇記云涪水在縣北

里自松州崆峒山出西北至州界南入綿州界益州
記云陰平縣有左擔道其路至險擔在左肩不得度
右肩也鄧艾由此伐蜀勝覽云左擔路上涪水崖壁
有閣道六曰青崖曰墓頤曰石回曰七里曰東閣曰
石城卽陰平所記者又縣有二閣曰猿臂曰黃林不
在左擔之數○寰宇記云石間在江油縣東百里有
石門戍漢水記云與氏分界於石門仇池戍去石門
四百餘里左思蜀都賦云緣以劍閣阻以石門顧野
王輿地志云石門在褒中之北漢中之西今按其山
兩邊有石壁相對望之如門鄧艾伐蜀歷此○寰宇

記云天池山在州南百三十里高九十二丈上有池周迴二十三步其水常滿號曰天池本名石人山天寶六年勅改爲靈液山○勝覽云太華山在江油縣南百四十里有三峰奇怪碑目云弘真觀古碑在江油縣南百三十四里太華山之登真觀此碑最古不記撰人姓名按此山卽羣仙錄所載黃奉仙隱處

石泉縣

漢靈帝以汶江蠶陵廣柔三縣立汶山郡廣柔卽今之石泉也志云縣北二里有泉甘冽崖上刻甘泉古蹟四字此縣名之始矣唐屬茂州宋神宗時靜州夷

寇邊攻茂州窒隴東以孤石泉成都守孫義叟經畫事宜以石泉爲邑介綿茂之間道里闊遠緩急不相應非扼其衝要不足捍外患於是詔改石泉縣爲軍按新編張上行字道從漢州德陽人登元豐第習於邊計後會石泉夷犯邊朝廷命義叟帥蜀召公問計公引唐王涯傳云吐蕃有兩道一由龍安青川縣一由綿州威蕃柵取抵雞城皆虜之險要今石泉三十里威蕃亭地名柵底卽唐之威蕃柵宜先築堡寨以禦其來次陞石泉爲軍以重其權然後調思黔義軍以制其暴則取功一時爲利後世不然蜀之憂未艾

也義叟盡用其策○石泉圖經國乎衆山之隈林巒叢菁樵蘇恣取不食地利而生計亦足○寰宇記縣蜀山史記黃帝子昌意娶蜀山氏女蓋此山也○郡國志云石紐山今在石泉縣南帝王世紀以爲鯀納有莘氏胸臆坼而生禹於石紐郡人以禹六月六日生是日熏修裸享歲以爲常水經注云石紐夷人共營之地方百里不敢居牧有罪逃野捕之者不逼能藏三年不爲人得則共原之言大禹之神所祐也碑目云禹穴二字大徑八尺李太白書刻在絕壁上○又云石泉縣有周萬歲通天碑前內供奉書手王惠

元書其石擊之清亮全類玉音碑陰有段文昌留題在報恩光孝觀又云誓水柱在治西四十五里河岸注高丈許圍五尺前人恐水衝縣故立此誓之未詳年代

蜀中雜錄

卷之二

蜀

